

重錄總校官侍郎臣高拱

學士臣胡正蒙

分校官編修臣孫從

寫書官序班臣馬繼文

國鼎監生臣林氏表

臣黃子幹

永樂大典卷之一萬一千九百五十五

十九梗

頂

灌頂經五

灌頂隨願往生十方淨土經第十一。亦名普度所問品。聞如是一時佛在鳩尸那竭國。娑羅雙樹間。爾時世尊般涅槃時。十方國土無央數衆。天龍八部。悉皆悲號歎息。禽獸離類。悉皆如是。來到佛所。稽首作禮。畢訖却坐。世尊告曰。若有疑者。今皆當問。正覺滅度。多所矜愍。設有問者。爲究竟說。爾時他方國土。有一菩薩名曰普廣。從座而起。稽首作禮。而白佛言。四輩弟子。臨終之日。若已終者。願欲往生十方國土。備何功德。而得往生。佛告普廣。菩薩摩訶薩。汝能愍念四輩弟子。及未來世諸衆生等。問此願生因緣之福。汝今諦聽。吾當爲汝而演說之。佛告普廣。菩薩摩訶薩。若四輩弟子。若臨終時。若未終者。願生東方香林剎者。其佛號曰入精進。菩薩無央數。國土莊嚴。若人願生彼者。隨願往生。佛告普廣。菩薩摩訶薩。若有善男子。善女人等。臨終之日。願生東南方金林剎者。其佛號曰盡精進。菩薩無央數。國土莊嚴。願生彼者。隨願往生。佛告普廣。菩薩摩訶薩。若

有善男子善女人等臨終之日願生南方樂林刹者其佛號曰不捨樂菩薩無央數國土莊嚴若人命終願生彼者隨願往生佛告普廣菩薩摩訶薩若有善男子善女人等臨終之日願生西南方寶林刹者其佛號曰上精進菩薩無央數國土莊嚴若人臨終時願生彼者隨願往生佛告普廣菩薩摩訶薩若有善男子善女人等臨終之日願生西方華林刹者其佛號曰習精進菩薩無央數國土莊嚴若人臨終願生彼者隨願往生佛告普廣菩薩摩訶薩若有善男子善女人等臨終之日願生西北方金剛刹者其佛號曰一乘度菩薩無央數國土莊嚴若人臨終願生彼者隨願往生佛告普廣菩薩摩訶薩若有善男子善女人等臨終之日願生北方道林刹者其佛號曰行精進菩薩無央數國土莊嚴若人臨終願生彼者隨願往生佛告普廣菩薩摩訶薩若有善男子善女人等臨終之日願生東北方青蓮華刹者其佛號曰悲精進菩薩無央數國土莊嚴若人臨終願生彼者隨願往生佛告普廣菩薩摩訶薩若有善男子善女人等臨終之日願生下方水精刹者其佛號曰淨命精進菩薩無央數國土莊嚴若人臨終願生彼者隨願往生佛告普廣菩薩摩訶薩若有善男子善女人等臨終之日願生上方欲林刹者其佛號曰至誠精進菩薩無

央數國土莊嚴。若人臨終願生彼者。隨願往生。佛告普廣菩薩摩訶薩。若四衆男女臨終之日。願生十方佛刹土者。當洗浴身體。著鮮潔之衣。燒衆名香。懸繒幡蓋。歌詠三寶。讀誦尊經。廣為病者說諸因緣譬喻言辭。微妙經義。苦空非身四大假合。形如芭蕉。中無有實。又如電光。不得久停。故云。色不久鮮。當歸敗壞。精誠行道。可得度苦。隨心所願。無不獲果。佛復告普廣菩薩摩訶薩言。十方妙土。通洞無窮。不可度量。諸佛如來所居淨土。亦復無量。不可稱數。今我於此大衆之中。為諸四輩未來之世像法衆生。說是十方諸佛國土。及佛名號。不可稱說。略演少耳。普廣菩薩摩訶薩。又白佛言。世尊。十方佛刹淨妙國土。有差別不。佛言。普廣。無差別也。普廣。又白佛言。世尊。何故經中讚歎阿彌陀刹。七寶諸樹宮殿樓閣。諸願生者皆悉隨彼心中所願。應念而至。佛言。普廣。汝不解我意。娑婆世界人多貪濁。信向者少。習邪者多。不信正法。不能專一。心亂無志。實無差別。今諸衆生。專心有在。是故讚歎彼國土耳。諸往生者。悉隨彼願。無不獲果。普廣菩薩。復白佛言。若四衆男女。若命未終。若已終者。我今當勸脩諸福業。得生十方諸佛刹也。佛言。善哉。普廣。隨意教導十方人也。普廣菩薩語四輩言。若人臨終。未終之日。當為燒香。然燈續明。於塔寺中。表刹之上。懸命過攝。

轉讀尊經。竟三七月。所以然者。命終之人。在中陰中。身如小兒。罪福未定。應為脩福。願亡者神。使生十方。無量刹土。承此功德。必得往生。亡者在世。若有罪愆。應墮八難。檣燈功德。必得解脫。若善願應生。父母在異家。不得疾生。以檣燈功德。皆得疾生。無復留難。若得生已。當為人作福德之子。不為邪鬼所得便也。種族豪強。是故應脩檣燈功德。諸命過者。脩行福業。至心懇惻。應代亡者。悔過衆罪。罪垢即滅。為亡者脩福。如餉遠人。無不獲果。譬如世間犯罪之人。心中思惟。望諸親屬。求諸大力。救其危厄。今日燒香。望得解脫。為亡者稱其名號。脩諸功德。以福德之力。緣是解脫。亦復如是。徑生十方。無願不得。普廣菩薩。又白佛言。若人在世。不歸三寶。不行法戒。若其命終。應墮三塗。受諸苦痛。其人臨終。方欲精誠。歸命三寶。受行法戒。悔過罪愆。發露懺謝。改更脩善。臨壽終時。聞說經法。善師化導。得聞法音。欲終之日。生是善心。得解脫。不佛言。普廣。若有善男子。善女人等。臨終之時。得生此心。無不解脫。衆苦者也。所以者何。如人負債。依附王者。債主更畏。不從求財。此譬亦然。天帝放赦。闍羅除遣。及諸五官。伺候之神。反更恭敬。不生惡心。緣此福故。不墮惡道。解脫厄難。隨心所願。皆得往生。普廣菩薩。復白佛言。又有衆生。不信三寶。不行法戒。或時生信。或時誹謗。或

是父母兄弟親族。卒得病苦。緣此命終。或墮在三塗八難之中。受諸苦惱。無有休息。父母兄弟及諸親族。為其脩福。為得福不。佛言普廣。為此八脩福者。七分之中。為獲一也。何故爾乎。緣其前世。不信道德。故使福德。七分獲一。若以亡者。嚴身之具。堂宇室宅。園林浴池。以施三寶。此福最多。功德力強。可得拔彼地獄之殃。以是因緣。使得解脫。憂苦之患。長得度脫。往生十方諸佛淨土。普廣菩薩。復白佛言。若四輩男女。善解法戒。知身如幻。精勤脩習。行菩提道。未終之時。逆脩三七。然燈續明。懸雜幡蓋。請召眾僧。轉誦尊經。脩諸福業。得福多不。佛言普廣。其福無量。不可度量。隨心所願。獲其果實。普廣菩薩。白佛言世尊。若四輩男女。若臨終時。若已過命。是其亡日。我今亦勸造作黃幡。懸著刹上。使獲福德。離八難苦。得生十方諸清淨土。播蓋供養。隨心所願。至成菩提。幡隨風轉。破碎都盡。至成微塵。風吹播塵。其福無量。幡一轉時。轉輪王位。乃至吹塵。小王之位。其報無量。然四十九燈。照諸幽冥。苦痛眾生。蒙此光明。皆得相見。緣此福德。拔彼眾苦。悉得休息。佛告普廣。若四輩男女。若行齋戒。心當存想。請十方僧。不擇善惡。持戒毀戒。高下之行。到諸塔寺。請僧之時。次第供養。無別異想。其福最多。無量無邊。若值羅漢。四道果人。及大心者。緣此功德。受福無窮。一聞說

法可得至道。無上涅槃。佛告普廣。及大眾人民。天龍八部。諸鬼神等。各諦聽。思惟吾言。我今欲於此大衆之中。說那舍長者本昔因緣。罪福之事。此大長者。居羅閱祇國。恒脩仁義。飢窮乏者。沙門婆羅門。諸求索者。悉欲供養。無所遺惜。父母大慳。無供養心。長者有緣。行至他方。晨朝澡洗著衣。結束已畢。跪拜父母。叉手白言。今有緣事。住至他方。有少財物。分爲三分。一分供養。供給父母。一分珍寶。施諸沙門。及貧乏者。餘有一分。自欲待行。父母言受。於兒行後。脩諸福德。若有人來。從求索者。悉當施與。於是長者。便辭父母。遠至他方。如是去後。父母邪見。無念子心。婆羅門沙門。及貧乏者。往從乞食。慳貪邪見。無施與心。子行去後。若干日數。應還到舍。又母計其應還歸家。住到市所。取豬羊骨。頭蹄膏血。果飯雜穀。持散家中。那舍長者。從遠方還。見其父母。歡喜無量。按足禮拜。問訊起居。父母亦復歡喜踊躍。語那舍言。我於汝行後。爲汝設福沙門。婆羅門。國中孤老。貧窮乞者。以汝財物。悉施與之。兒聞設福布施。貧乏心大歡喜。又語兒言。我亦復請諸沙門。設福始竟。今日家中。草穢狼籍。猶未掃除。兒見狼籍。相貌如是。信其父母。爲設福德。倍復歡喜。踊躍無量。久後之間。父母衰老。得諸病苦。便即命終。那舍即便殯歛屍骸。安厝粗畢。從父母命終。轉讀尊經。燒香禮拜。

歌詠讚歎。無一時廢。竟于三七。經聲不絕。作是思惟。我父母在世。極憂念我。多備福德。今我又復請諸聖衆。想我父母。緣此功德。故應往生。十方刹土。供養恭敬。面見諸佛。於是那舍。忽得重病。奄便欲死。唯心上。暖。家中大小。未便殯歛。至七日後。乃得蘇解。家中問言。那舍長者。痛苦如是。本死今蘇。從何而來。長者那舍。語其家言。我數日中。善神將我。示以福堂。無極之樂。又到地獄。靡不經歷。眼中所覩。唯苦痛耳。今我又見餓鬼住處。所生父母。在中受苦。見我來看。悲號懊惱。欲求免脫。不能得出。我思父母在世之時。大備福德。意謂生天。而反更墮餓鬼。獄中受諸苦惱。那舍長者。說此語已。向其家中。懊惱流淚。我今家中。當作何方功德之力。拔我父母。使得解脫。那舍長者。又自思惟。我父母昔病苦之時。大備福德。欲終未終。及命終已。然燈續明。轉經行道。齋戒一心。乃至三七。未曾懈廢。今我父母。而更生此罪苦地獄。必當有意。便問親族。及諸耆宿。耆宿答言。我不了此深妙之事。可往諮問。佛世尊也。於是長者。便往佛所。頭面作禮。胡跪合掌。而白佛言。欲有咨請。唯願世尊。慈悲不誑。佛言。便說長者那舍。說向因緣。父母在世。常備福德。及命終後。為供三七。至安曆畢。謂言生天。而更墮在地獄之中。已問耆宿。耆宿不了。今故問佛。為我決疑。緣我重病。奄便欲死。七日

乃蘇善神將我經歷地獄。靡不周遍。以是因緣。得見父母。在苦劇地獄。備福如此。而更墮罪不解。所以今故問佛。唯願世尊。釋我疑網。備何福業。令我父母解脫厄難。不遭患苦。悉得生天。封受自然快樂無極。得涅槃道。佛語長者。汝一心諦聽。我之所說。汝前欲行。往至他方。留財寶物。與汝父母。令汝父母脩諸福德。父母邪見。欺誑於汝。實不脩福。妄言爲作。脩諸福緣。以慳貪故。墮彼地獄。長者聞佛神口所說。疑惑永除。作如是言。是我之過。非父母咎。卽於佛前。代其父母。悔過此罪。慳貪之殃。長者父母。於彼地獄。少得休息。佛語長者。令我借汝天眼。使汝得見父母休息。長者於是承佛威神。見其父母。皆得休息。那舍長者。又白佛言。今者又當作何福業。使我父母解脫彼苦。佛語長者。今諸聖衆。安居三月。行道欲竟。可還家中。作百味飲食之具。種種甘美。以好淨器。盛持供養。及好衣服。種種華香。金銀珍寶。雜碎供具。以施於僧。令汝得福。使汝父母解脫此難。不復受苦。餓鬼形也。長者那舍。卽如佛言。還家供辦。不違尊教。作供養已。緣此生天。封受自然。無爲快樂。汝今欲見。汝父母所生宮殿。慶不。今更以我威神。令汝得見。不復生苦。長者承佛威神之力。見其父母。生在天上。諸天娛樂。自在隨意。無復障礙。佛告長者。罪福如是。不可不慎。如長者眼所見。心所聞。故言自作自得。

非天與人。如長者父母。雖在餓鬼。其罪小輕。一切餓鬼。受罪甚重。不可具說。長者父母。其罪輕者。有小福德。扶接使爾。長者脩福。竟于三七於諸餓鬼。受罪輕也。所以然者。前章中言。若人在世。不識三寶。不脩齋戒。無善師教。過命已後。兄弟父母。親屬知識。為其脩福。七分之中。為獲一也。是故長者。父母有罪。雖在地獄餓鬼之中。受罪輕者。緣脩福故。七分獲一。今脩福德。供養眾僧。以是因緣。解脫眾難。故得生天。佛告普廣菩薩摩訶薩言。若人未終。臨終之日。若已終竟。又是終日。父母親族。知識朋友。為命終者。脩諸福德。齋戒一心。洗浴身體。著鮮潔之衣。一心敬禮十方諸佛。又當稱揚十方佛名。別以華香供養諸佛。可得解脫憂苦之患。得昇天上。入泥洹道。佛告普廣菩薩摩訶薩言。若未終時。禮拜十方諸佛。命終之人。所生之處。常得值佛。千劫萬劫。億萬劫。數重罪之殃。無不得脫。亦復當為。說是灌頂。無上章句。三世諸佛。天中之天。各皆順奉。三世如來。說是無上。摠持章句。普廣汝當諦聽。我今為汝。及一切眾生。諸病苦者。若其臨終。若已終竟。復是終日。聞此章句。所生之處。當得見佛。不墮八難。遠於惡道。於是世尊。在大眾中。宣說諸佛。無上章句。即作偈頌而說之曰。波利富樓那。遮利三曼陀。達舍尼羅佉。摩訶毗羅訶。伽帝三曼陀。毗陀摩伽帝。摩訶伽利波。波利婆闍。

伽婆婆妻伽提。脩鉢利富那。阿利那達摩。摩訶毗波提。帝利毗波伽。脩勒波僧祇。薩帝三傳。又摩訶三曼陀。阿陀摩羅尼。阿利摩羅多。毗跋三曼陀。達尼佉羅陀。佛語普廣菩薩摩訶薩言。是為灌頂無上章句。畢竟不二。解除亡者。無量罪厄。令過命者。得生天上。隨心所願。往生十方。此大章句。真實之言。在所生處。常見十方微妙淨土。若在世時。應當受持。如是章句。齋戒一心。為過命者。七日七夜受行八禁。長齋菜食。禮敬十方諸佛世尊。當發大誓願。我獲得僧那僧涅諸眾生輩。使證無上。正真大道。爾時世尊。說是語已。告諸大眾。善男子。善女人等。及天龍八部。一切鬼神。汝等眾輩。聞說十方淨佛國土。復聞說是那舍長者。因緣罪福。生信心。不普廣菩薩。復從座起。白佛言。世尊。說是十方諸佛淨土。無量功德。莊嚴快樂。復得聞是。那舍因緣世尊。又說眾事。因緣甚善。大善。踊躍無量世尊。說是多所利益。後世眾。生緣此解脫。以為軌則。不復貪恡。資生之物。聞此經言。但生施心。無所愛惜。隨意施與。貧乏使足。國土豐饒。施心平等。如是漸漸。積功累德。悉成佛道。普廣菩薩。又白佛言。若四輩男女。欲脩學。是願生淨土。灌頂經典。有幾事。行得此經法。佛言。普廣。有十二事。可得脩學。是經典也。一。至終不犯。三者勤學。禪定。教末學者。四者忍辱。不瞋。見惡不惱。五者。

常樂布施。慙念孤老六者。常勤精進。晝夜不懈。七者。若行來出入。朝拜塔像。及諸尊長。然後捨去。八者。合集衆人。爲作唱導。普得信心。九者。不貪世業。衣服伎樂。資生之物。常好苦行。依四依法。十者。行此法時。無所希望。但欲利益諸衆生。輩不於其中。希人利養。十一者。至終不謫邪命。自活十二者。行此法時。不擇富貴豪樂之人。貧苦求者。等心看之。無有異想。是爲十二正化之事。時普廣聞此心。大歡喜。我當奉行。至終不犯。佛說經竟。是諸大衆。無不歡喜。阿難因從座起。演說法竟。當何名之。佛語阿難。此經名爲普廣所問。十方淨土。隨願往生。亦名那舍罪福因緣。又名灌頂。無上章句。佛說是經。已四衆人。民天龍八部。聞佛所說。作禮奉行。

灌頂章句。拔除過罪。生死得度。經第十二。聞如是一時。佛遊維耶離音樂樹下。與八千比丘衆。菩薩三萬六千人俱。國王長者。大臣人民。及諸天龍八部鬼神。共會說法。於是文殊師利法王子。菩薩摩訶薩。承佛威神。從座而起。長跪叉手。前白佛言。世尊。願爲未來像法衆生。宣揚顯說。往昔過去諸佛名字。及清淨國土。莊嚴之事。願爲解說。得聞法要。佛告文殊師利。善哉善哉。汝大慈無量。慙念罪苦一切衆生。問此往昔諸佛名字。及國土清淨莊嚴之事。利益一切。無量衆生。度諸危厄。令得安隱。汝今諦聽。諦

受善思念之。吾當爲汝分別說之。衆座諸菩薩摩訶薩。無央數衆。又諸應真國王長者大臣人民。天龍鬼神。四輩弟子。皆各嘿然。聽佛所說。莫不歡喜。一心樂聞。佛告文殊師利。東方去此佛刹十恒河沙世界。有佛名曰藥師琉璃光如來。無所著至真等正覺。明行足善逝。世間解。無上士調御丈夫。天人師。佛世尊。度脫生老病死苦患。此藥師琉璃光佛。本所脩行菩薩道時。發心自誓。行十二上願。令一切衆生。所求皆得。第一願者。使我來世。得作佛時。自身光明普照十方三十二相八十種好。而自莊嚴。令一切衆生。如我無異。第二願者。使我自身猶如琉璃。內外明徹。淨無瑕穢。妙色廣大。功德巍巍。安住十方。如日照世。幽冥衆生。悉蒙開曉。第三願者。使我衆世智慧廣大。如海無窮。潤澤枯涸。無量衆生。普使蒙益。悉令飽滿。無飢渴想。甘食美饌。悉持施與。第四願者。使我來世。佛道成就。巍巍堂堂。如星中之月。消除生死之雲。令無有翳。明照世界。行者見道。熱得清涼。解除垢穢。第五願者。使我來世。發大精進。淨持戒地。令無濁穢。慎護所受。令無缺犯。亦令一切戒行具足。堅持不犯。至無爲道。第六願者。使我來世。若有衆生。諸根毀敗。盲者使視。聾者使聽。瘖者得語。僂者能伸。跛者能行。如是不完具者。悉令具足。第七願者。使我來世。十方世界。若有

苦惱無救護者。我爲此等。設大法藥。令諸疾病。皆得除愈。無復苦患。至得佛道。第八願者。使我來世。以善業因緣。爲諸惡冥。無量衆生。講宣妙法。令得度脫。入智慧門。普使明了。無諸疑惑。第九願者。使我來世。摧伏惡魔。及諸外道。顯揚清淨。無上道法。使入正真。無諸邪僻。迴向菩提。入正覺路。第十願者。使我來世。若有衆生。王法所加。臨當刑戮。無量怖畏。愁憂苦惱。若復鞭撻。枷鎖其體。種種恐懼。逼切其身。如是無邊。諸苦惱等。悉令解脫。無有艱難。第十一願者。使我來世。若有衆生。飢火所惱。令得種種甘美飲食。天諸餽饈。種種無數。悉以施與。令身充足。第十二願者。使我來世。若有貧凍。裸露衆生。即得衣服。窮乏之者。施以珍寶。倉庫盈溢。無所乏少。一切皆受。無量快樂。乃至無有一人受苦。使諸衆生。和顏悅色。形貌端嚴。人所喜見。琴瑟鼓吹。如是無量。最上音聲。施與一切。無量衆生。是爲十二。微妙上願。佛告文殊師利。此藥師琉璃光佛。本願功德。如是我今爲汝畧說。其國莊嚴之事。此藥師琉璃光如來。國土清淨。無五濁。無愛欲。無意垢。以白銀瑠璃爲地。宮殿樓閣。悉用七寶。亦如西方無量壽國。無有異也。有二菩薩。一名日曜。二名月淨。是二菩薩。次補佛處。諸善男子。及善女人。亦當願告彼佛國土也。文殊師利。白佛言。世尊。唯願演說。藥師瑠

琉璃如來無量功德。饒益衆生。今得佛道。佛言。若有善男子。善女人。新破
衆魔。來入正道。得聞我說。是藥師琉璃如來名字者。魔家眷屬。退散馳
走。如是無量。彼衆生苦。我今說之。佛告文殊師利。世間有人。不解罪福。慳
貪。不知布施。今世後世。當得其禍。世人愚癡。但知貪惜。寧自割身肉。而耽
食之。不肯持錢財布施。求後世之福。世又有人。身不衣食。此大慳貪。命終
之後。當墮地獄。餓鬼。及畜生中。聞我說。是藥師琉璃如來名字之時。無
不解脫。憂苦者也。皆作信心。貪福畏罪。人從索頭。與頭索眼。與眼乞妻。與
妻乞子。與子求金銀珍寶。皆大布施。一時歡喜。即發無上正真道意。佛言。
若復有人。受佛淨戒。遵奉明法。不解罪福。唯知明經。不及中義。不能分別
曉了中事。以自貢高。恒常嗔憤。乃與世間。衆魔從事。更作縛著不解行之
戀著婦女。恩愛之情。口為說空。行在有中。不能發覺。復不自知。但能論說。
他人是非。如此人輩。皆當墮於三惡道中。聞我說。是藥師琉璃如來。本願
功德。無不歡喜。念欲捨家行作沙門者也。佛言。世間有人。好自稱譽。皆
自貢高。當墮三惡道中。後還為入牛馬奴婢。生下賤中人。當乘其力。負重
而行。困苦疲極。亡失人身。聞我說。是藥師琉璃如來。本願功德者。皆當
一心歡喜踊躍。更作謙敬。即得解脫。衆苦之患。長得歡樂。聰明智慧。遠離

惡道。得生善處。與善知識。共相值遇。無復憂惱。離諸魔縛。佛言。世間惡
癡人輩。兩舌鬭諍。惡口罵詈。更相嫌恨。或就山神樹下鬼神日月之神。南
斗北辰諸鬼神等。所作咒誓。或作人名字。或作人形像。或作符書。以相
厭禱。呪咀言說。聞我說是藥師琉璃光佛本願功德。無不兩作和解。俱生
慈心。惡意悉滅。各各歡喜。無復惡念。佛言。若四輩弟子比丘比丘尼清信
士。清信女。常脩月六齋。年三長齋。或晝夜精勤。一心苦行。願欲往生西方
阿彌陀佛國者。憶念晝夜。若一日二日三日四日五日六日七日。或復中
悔。聞我說是藥師琉璃光佛本願功德。盡其壽命。欲終之日。有八菩薩。其
名曰。文殊師利菩薩。觀世音菩薩。得大勢至菩薩。無盡意菩薩。寶檀華
菩薩。藥王菩薩。藥上菩薩。彌勒菩薩。如是八菩薩摩訶薩等。皆當飛往。迎
其精神。不經八難。生蓮華中。自然音樂。而相娛樂。佛言。假使壽命自欲
盡時。臨終之日。得聞我說是藥師琉璃光佛本願功德者。命終之後。皆得
上生天上。不復經塵三惡道中。天上福盡。若下生人間。當為帝王家作子。
或生豪姓長者居士富貴家。生。皆當端正。聰明智慧。高才勇猛。若是女人
化成男子。無復憂苦。患難者也。佛語文殊師利。我稱譽顯說藥師琉璃光
佛。至真等正覺。本所脩習。無量行願功德。如是。文殊師利。從座而起。長跪。

叉手。白佛言。世尊。佛去世後。當以此法。開化十方一切衆生。使其受持。是經典也。若有善男子。善女人。愛樂是經。受持讀誦。宣通之者。復能專念。若一日。二日。三日。四日。五日。乃至七日。憶念不忘。能以好業。帛書。取是經。五色雜絲。作囊盛之者。是時當有諸天善神。四大天王。龍神八部。常來營衛。愛敬此經。日月作禮。持是經者。不墮橫死。所在安隱。惡氣消滅。諸魔鬼神。亦不中害。佛言。如是如是。如汝所說。文殊師利言。天尊所說。言無不善也。佛言。文殊師利。若有善男子。善女人等。發心造立藥師瑠璃光如來形像。供養禮拜。懸雜色幡蓋。燒香散華。歌詠讚歎。圓遶百匝。還坐本處。端坐思惟。念藥師瑠璃光佛。無量功德。若有善男子。善女人。七日七夜。菜食長齋。供養禮拜。藥師瑠璃光佛。求心中所願者。無不獲得。求長壽得長壽。求富饒得富饒。求安隱得安隱。求男女得男女。求官位得官位。若命遇已。後欲生妙樂天上者。亦當禮敬藥師瑠璃光佛。至真等正覺。若欲上生三十三天者。亦當禮敬藥師瑠璃光佛。必得往生。若欲與明師。世世相值者。亦當禮敬藥師瑠璃光佛。佛告文殊師利。若欲生十方妙樂國土者。亦當禮敬藥師瑠璃光佛。若欲得生兜率天上。見彌勒者。亦當禮敬藥師瑠璃光佛。若欲遠諸邪道者。亦當禮敬藥師瑠璃光佛。若夜惡夢。鳥鳴。百怪。蜚尸。